

清河縣志卷之三

人才

自來傑士偉人銘鐘鼎而播竹帛者後人必詳考其里居
蓋邦家之光實閭里之榮也清邑昔在漢時人文蔚起經
學如張禹崔瑗名臣如李雲王經皆彪炳史冊輝映千古
自是而後極盛爲難繼焉然山川靈秀鍾毓無私景仰前
哲曷禁跂予望之

漢

張禹字長子受春秋左氏傳於潯陽令貫長卿與蕭望
之同時爲御史數爲望之言左氏望之善之上書數以稱

說後望之爲太子太傅薦禹於宜室徵禹待詔殊及問會

疾卒

按成帝病張禹係襄國入則宿衛已
有兩張禹不止後漢又有一張禹也

李雲字行祖初舉孝廉再選白馬令桓帝延熹二年中

常侍單超等五人皆以誅梁冀功並封列侯專權擅恣又

立掖庭民女竈氏爲皇后時災異頻見雲素剛直憂國乃

露布上書曰帝者諦也今官位錯亂小人諂進賄賂公行

政化日損尺一拜用不經御省是帝欲不諦乎帝得奏震

怒下雲獄詔使中常侍與御史廷尉雜考之時宏農五官

掾杜衆傷雲以忠諫獲罪上書願與雲同日死并下廷尉

太鴻臚陳蕃又上疏救之言雲雖干上逆旨其意歸於忠

國昔高祖忍周昌不諱之諫成帝赦朱雲腰領之誅今日
殺雲臣恐剖心之讖復議於世矣太常楊秉洛陽市長沐
茂郎中上官資并上書請貸雲帝志甚蕃秉免歸田旦茂
資貶秩二等帝在濯龍池侍中管霸奏雲等事言李雲耶
澤愚儒杜衆郡中小吏出於狂慙不足加罪帝謂霸曰帝
欲不誦是何等語而常侍欲原之耶雲衆皆死獄中後冀
州刺史賈琮使刑部過雲墓刻石表之

胡常字少子常受書於膠東庸生以明穀梁春秋爲博
士部刺史又傳左氏常授教徐敖敖爲右扶風掾

劉統爲當縣知名士杜詩嘗薦進之

房植字伯武以經學知名永和間爲李固所薦陳留楊倫河南尹存東平主惲陳國何臨同日徵用

周福字仲進桓帝爲蠡吾侯時從受學焉及卽位擢福爲尙書鄉人爲之謠曰天下規矩房伯武因師獲印周仲進

崔琰字季珪少樸訥好擊劍年二十三鄉移爲正始感激讀論語韓詩至年二十九乃結公孫方等以就鄭元學因黃巾賊起歸而以琴書自娛大將軍袁紹聞而辟之曹操破袁氏領冀州牧辟琰爲別駕從事謂琰曰昨按戶籍可得三十萬衆故爲大州也琰對曰今天下分崩九州幅

裂二袁兄弟親尋干戈冀方蒸庶暴骨原野未聞王師仁
聲先路存問風俗救其塗炭而校計甲兵惟此爲先斯豈
鄙州士女所望於明公哉操改容謝之

魏

王經字彥偉清河人稱冀州名士仕魏爲江夏太守大

將軍曹爽附縉二十疋令交市於吳經不發書棄官歸後
復起歷二州刺史司隸校尉事魏主髦爲尙書時司馬昭
威權日盛魏主不勝其忿欲自討之經諫曰昔魯昭公不
忍季氏敗走失國且宜緩圖不可造次弗聽王沈王業謂
經曰事急矣不可自取滅族經大怒曰主憂臣辱主辱臣

死敢懷二心乎魏主拔劍升輦鼓譟而出經哭諫曰陛下
以數百人伐昭空死無益臣非惜命實見事不可行耳又
弗聽賈充自外入逆戰於南關下成濟抽戈刺魏主殞於
車下衆皆逃走經大罵逆賊充怒遂被執昭又使人收經
全家付廷尉經哭謝其母曰不孝子累及慈母矣母笑曰
人誰不死正恐不得其所耳以此拚命何恨之有及就刑
故吏向雄哭之哀動一市晉武帝太始元年詔書故尚書
王經雖身陷法辟然守志可嘉門戶湮沒意常愍之賜經
孫郎中

張揖字稚讓魏太和間爲博士著司馬相如傳解一卷

朱靈字文博初爲袁紹攻公孫瓚靈家在城中瓚將靈母弟置城上誘呼靈靈望城涕泣曰丈夫出身與人甯復顧家耶力戰拔之而靈家皆死從曹操征伐有功文帝禪位封鄒侯詔稱元功之將社稷之臣後更封高唐亭侯

崔林字德儒少無名望姻族莫知惟從兄琰異之太祖定冀州召除鄆長貧無車馬單步之官太祖爭壺關問長吏德政最者并州刺史張陟以林對文帝踐阼拜尙書出爲幽州刺史景初元年司徒司空並缺散騎侍郎孟康薦林曰夫宰相者天下之所瞻效誠宜得秉忠履正本德仗義之士足爲海內所師表者竊見司隸校尉崔林稟自然

之正性聽高雅之宏量論其所長以比古人忠直不同則
史魚之傳清儉守約則季文之匹也特守州郡所在而治
及爲外司萬里肅齊誠台輔之大器衮職之良才也後年
遂爲司空封安陽亭侯食邑六百戶頃之又進封安陽鄉
侯正始五年薨諡曰孝侯子述嗣

晉

房 悅字季欣亮之弟晉太元間爲高州太守轉廣州太
守加鎮遠將軍時齊州刺史張瓊表所部置南清河郡仍
請悅爲太守朝廷從之凡厯三郡吏民稱治遷平東將軍
大中大夫卒贈征東將軍齊州刺史長子超次子昭皆仕

房超字伯穎悅之子齊天保初爲黎陽郡太守有趙道
德者使以書屬超超不發書棒殺其使文宣於是令守宰
各設棒以誅屬請之使

李遼父回綏當雲擾時據有邦邑太元元年歸晉遣遼
奉表路經關里慨其廟庭傾頽上表求興復建講學十四
年敕下魯郡營飭遼出家布助工廟成蠲復數戶供灑埽
并給六經講習庠序延宿儒集後進遼之力居多按綱目
晉孝武帝十四年李遼上表請敕兗州修孔子廟給戶灑
埽仍立庠序以教學者曰事有如餘而實急者此之謂也
疏奏不省書法云李遼清河人也所請兗州廟也何以書

嘉遼也故特書而揭名之宛州夫子所生也廟廢不修他
可知矣綱目前書罷遣太學生徙前書立佛精舍於是書
請修孔子廟不報重傷晉也書孔子廟始此

房叔安明帝時爲青州刺史王元邈長史齊蕭道成鎮淮
陰爲明帝所疑乃遺書元邈欲北結魏叔安進曰夫布衣
韋帶之士御一餐而不忘義使之然也今將軍無故舉忠
孝而棄之三齊之士甯蹈東海死耳元邈乃止道成卽位
懷其中正叔安時爲益州司馬甯蜀太守就拜前將軍方
用爲梁州會病卒帝哭曰叔安節義古人中求之耳

崔道固世祖時以幹用見知爲左軍將軍景和元年出爲

冀州刺史又進號征北將軍時徐州刺史薛安都同逆上
卽還遣固本號爲徐州代之道固不受命遣子景微軍主
傳靈越率衆赴安都旣而爲土人所攻屢戰失利會四方
平定宋遣使宣慰道固歸順先是與沈文秀共引敵敵旣
至固守拒之囚被圍逼敵每進輒爲道固所摧三年以爲
都督冀青兗幽并五州諸軍事前將軍冀州刺史加節又
進號平北將軍其年爲敵所陷被送柔乾死於敵

北魏

房天樂先爲青州別駕刺史沈文秀拔爲長史督齊鄆州
府之事一以委之慕容伯曜攻青州樂攬據固守城陷爲

其所執

王廟北魏時爲楚州刺史俗尙鬼城北有伍子胥廟禱者必以酒牛至破產業勵曰子胥賢者豈肯損百姓乃告諭所部自此遂止

監伯陽頓邱董徵從之受論語毛詩春秋周易徵由是知名魏世宗詔徵爲諸王教授其學出於伯陽

房亮字景高父法延譙郡太守亮好學有節操太和間舉秀才拜祕書郎副中書侍郎宋弁使高麗高麗王託疾不拜以亮辱命坐白衣守郎中後除濟北平原太守俱以清嚴稱時冀州刺史王愉據州反平原界在河北與愉接

境愉乃遣人說亮啖以榮利亮卽斬其使發兵防捍愉怒遣其大將軍張靈和率衆攻亮亮督兵拒擊大破之後爲州州刺史留心撫納海內安之時邊州刺史例得一子出身亮不言其子而啟弟子超爲奉朝請議者稱之入爲光祿大夫加安東將軍永安二年卒年七十一贈撫軍將軍齊州刺史弟詮子柬並以仕顯弟悅有治績

傳永字修期拳勇過人年二十餘有友人與之書而不能報請於叔父洪仲洪仲讓之永乃發憤讀書涉獵經史兼有才筆魏高祖用爲平南長史兩月之中再獻戰捷高祖嘉之遣謁者就豫州策拜永安遠將軍鎮南府長史汝南

太守貝邱縣開國男食邑二百戶高祖每歎曰上馬能擊
賊下馬作露布惟傳修期耳坐與高聰等救渦陽不利免
官無何又以功爲清河男嘗與賊仙埤戰被射洞其左股
拔箭復入大破賊斬仙埤子仙埤遁去中山王英於陣謂
承曰公傷矣且還營承曰昔漢祖捫足不欲人知下官雖
微國家一帥奈何使有傷將之名遂追賊極夜而返時年
七十餘矣三軍莫不壯之後除大中大夫行秦梁二州事
承每言曰文淵充國竟何人哉吾獨白首見拘此郡深用
扼腕然於治民非其所長年踰八十嘗諱言老每自稱六
十九還京拜征東將軍光祿大夫子叔偉九歲爲州主簿

及長膂力過人挽弓三百斤左右馳射又能立馬上與人角騁見者以爲得永之武而不得永之文也叔偉子豐立正光間襲封

趙 約嘗從崔彥學以醫術知名

張 御師事李先容學占相之術有名

范 晷字彥良南陽順陽人游學清河遂徙家僑居郡徵爲五官掾歷涼州刺史轉雍州刺史俱有政聲加左將軍二子廣雅廣字宇終舉孝廉除靈壽令不之官

北齊

崔 瑾篤志經學問大儒徐遵明通鄭康成所注周易往

文學焉

李曉字仁畧隴西人學有思理寓居清河託從母兄崔俊給田築室安居訓子無復有宦情

隋

房山基隋大業時北海高構以工吏事知名舉山基爲考功特稱明幹

崔煥隋大業時爲咸陽尉政聲著聞上下稱頌

唐

張固有詩名在唐懿僖間採摭宣宗遺事簡當精覈可以補史氏之闕

司空頌唐僖宗舉進士不第後去爲羅紹威掌書記紹威卒入梁爲太府少卿楊師厚鎮天雄頌解官往依之師厚卒賀德倫代之張彥之亂問誰可草奏者吏言頌乃馳騎召之頌爲亂兵劫其衣以敝服至見彥長揖神氣自若揮筆成文彥甚喜卽給以衣服僕馬遂以爲德倫判官

張 蟪生而秀穎幼善吟詠有登單于臺詩知名唐昭宗乾甯二年進士第授校書郎調櫟陽尉遷犀浦令僞蜀王建開國拜膳部員外郎後爲金堂令王衍游大慈寺觀壁上題詩愛賞久之問誰爲之左右以蟪對因給筆札令以詩進將召知制誥宋光嗣以其輕傲駙馬宜疏之由是上